

四庫全書

史部

欽定四庫全書

欽定續通志卷三百十八

列傳

宋 二十二

馬全義

知節

雷德驤

有終簡夫

孝先

王超

德用

馬全義幽州薊人自幼學擊劍善騎射十五隸魏帥范延光帳下延光叛晉祖征之以城降悉籍所部來上全

義在籍中因補禁軍不得志遂遁去漢乾祐中李守貞鎮河中召置帳下及守貞叛周祖討之全義每率敢死士夜出攻周祖壘多所殺傷守貞貪而無謀性多忌克全義屢為畫策皆不能用城陷遂變姓名亡命周廣順初世宗鎮澶淵全義往事之從世宗入朝周祖召見補殿前指揮使謂左右曰此人忠於所事昔在河中屢挫吾軍汝等宜效之世宗即位遷右番行省從戰高平以功遷散員指揮使從征淮南以功遷殿前指揮使右番

都虞候恭帝立授鐵騎左第二軍都校領播州刺史太祖即位歷內殿直都知控鶴左廂都校領果州團練使從征李筠筠退保澤州城小而固攻之未下太祖患之召全義問計對曰筠守孤城若併力急攻立可殄滅倘緩之適足長其姦爾太祖曰此吾心也即麾兵急擊之全義率敢死士數十人乘城攀堞而上飛矢貫臂流血被體全義拔鏃臨敵士氣益奮遂克其城遷虎捷左廂都校領睦州防禦使又從征李重進領控鶴虎捷兩軍

為後殿賊平班師錄功居多改龍捷左廂都校領江州防禦使俄被疾太祖遣太醫診視仍諭密旨曰俟疾間當授以河陽節制全義疾已亟但叩頭謝數日卒年三十八特贈檢校太保大同軍節度使子知節

知節字子元幼孤太宗時以蔭補供奉官賜今名

按隆平集

載全義卒太祖念其功其子方七歲召見特授供奉官賜名知節據此則知節授官在太祖時也

年十

八監彭州兵以嚴涖衆衆憚之如老將又監潭州兵時何承矩為守鎮以文雅飾吏治知節慕之因折節讀書

雍熙間護兵博州契丹入邊劉廷讓敗於君子館先是

知節完城繕甲儲積芻粟吏民以為生事既而契丹果

至以有備引去衆始服徙知定遠軍時議調河南十三

州之民

按宋史樊知古傳作調發河南十七州軍此作十三軍互異

輸餉河北轉運

使樊知古適至軍議事知節曰此軍丁少粟多簸其紅

腐當得十之六七知古從之果獲粟五十萬斛分給諸

屯遂省河南之役時部民入躲避寇卒有盜婦女首飾

者護軍止笞遣之知節曰民避外患而來反罹內寇此

而可恕何以肅下即命斬之知深慶二州遷西京作坊

使旋知梓州李順之叛詔與王繼恩同討賊

按李順亂成都王繼

恩為西蜀招安使討之王繼恩自有傳此作劉繼恩誤今改

繼恩恃勢自任惡知節

不附已遣守彭州付以羸兵三百彭之舊卒悉召還成

都知節累請益兵不從賊衆十萬攻城知節力戰自晨

抵晡士多死慨然歎曰死賊手非壯夫也即橫槊潰圍

出遲明援兵至復鼓譟入賊遂潰去帝聞而壯之曰賊

衆我寡知節不易當也授益州鈐轄加益漢九州都巡

檢使會韓景祐帳下劉盱脅牙兵為亂連破州縣衆踰二千知節領兵三百追至蜀州與戰盱走邛州知節曰賊破邛州必乘勝渡江薄我既息而後戰官軍雖倍制之亦勞不如乘其弊急擊之破之必矣追至方井鎮與盱遇殺之無噍類咸平初領登州刺史知秦州州嘗質羌酋支屬二十餘人踰二紀矣知節曰羌亦人爾豈不懷歸悉遣之羌人感之訖終更不犯塞時州有銀坑歲久鑛竭課額弗除主吏破產償之不足知節請蠲之章



三上乃允遷西上閤門使知益州兼本路轉運使自乾德後歲漕蜀物動踰萬計時籍富民以部舟運坐沉覆破產者衆知節請以省校代鄉戶運舟而程其漕事自是蜀人賴以免患徙知延州兼廊延駐泊部署邊寇將至方上元節遽命張燈啓關累夕宴樂寇不測即引去會鎮州程德玄政事曠弛徙知節代之詔發澶魏等六州糧輸定武時兵交境上知節曰糧之來是資盜也止令於舟車所至收之寇無所得而遁車駕在澶淵時王

超擁兵數十萬屯真定逗留不進知節移書謂讓之超始出兵猶以中渡無橋為辭知節預命度材一夕而具景德中徙知定州未幾遷東上閣門使樞密都承旨擢拜簽書樞密院事時契丹已盟中國無事大臣方言符瑞知節每不然之嘗言天下雖安不可忘戰去兵以為戒自陳年齒未衰五七年間尚可驅策如邊方有警願預其行但得副都部署名及良馬數匹輕甲一聯足矣帝以為然因命製銅鐵鎖子甲以賜焉進宣徽北院使

加兼樞密副使時王欽若為樞密使知節薄其為人遇事敢言未嘗少屈每廷議得其不直輒面詆之欽若寵顧方隆知節愈不為下天禧初召拜宣徽南院使知樞密院事以疾乞罷除彰德軍留後知貝州兼部署將行真宗閱其癰瘕止命歸鎮時上黨大名之民已爭來迎謁未幾卒年六十五贈侍中謚正惠知節將家子以武力智謀自許又能好書賓友儒者所與善厚必一時豪傑論事謇謇未嘗有所顧忌故聞其風者亦知其為正

直云

雷德驤字善行同州郃陽人周廣順三年舉進士解褐  
磁州軍事判官召為右拾遺充三司判官太祖即位拜  
殿中侍御史改屯田員外郎判大理寺其官屬與堂吏  
附會宰相趙普擅增刑名因上言欲求見太祖以白其  
事未引對直詣講武殿奏辭氣俱厲太祖詰之德驤對  
曰臣值陛下日旰未食方震威嚴爾帝怒令左右曳出  
詔置極典俄怒解黜為商州司戶參軍刺史知德驤舊

為省郎以客禮之及奚嶼知州希宰相旨至則踞為庭  
參德驤不能堪出怨言嶼銜之適有言德驤至郡為文  
訕上者嶼召德驤與語潛遣吏給其家人取得之即械  
繫德驤具狀以聞太祖貸其罪削籍徙靈武數年其子  
有鄰擊登聞鼓訴中書不法事趙普由是出鎮河陽召  
德驤為祕書丞俄分判御史臺三院事又兼判吏部南  
曹開寶七年同知貢舉太平興國四年車駕征太原為  
太原西路轉運使六年同知京朝官考課遷兵部郎中

七年以公累降本曹員外郎出知懷州未幾復舊官又命為兩浙轉運使其子殿中丞有終亦為淮南轉運使父子同日受詔縉紳榮之俄遷右諫議大夫雍正二年徵歸朝同知京朝官考課初帝謂宰相曰朕前日閱班籍擇官為河北轉運使所患不能周知羣臣履行自今令德驤錄京朝官履歷功過之狀引對既得漸識羣臣擇才委任且使有官政者樂於召對負瑕累者恥於顧問可以為懲勸矣端拱初遷戶部侍郎會趙普再入相

宣制之日德驤方止班不覺墜笏遽上疏乞歸田里太宗召見安諭之賜白金三十兩罷知考課止以本官奉朝請會議事尚書省乘酒叱起居員外郎鄭構為盜御史劾奏下御史臺案問具狀帝止令罰月奉而釋之訖趙普出守西洛帝終保全之淳化二年為其壻如京副使衛濯訟有鄰子孝先內亂帝素憐德驤惡暴揚其醜不以孝先屬吏止除名配均州德驤坐失教責授感德軍行軍司馬并其子少府少監有終責授衡州團練副

使德驤因慙憤成疾二年卒年七十五有終為三司鹽  
鐵副使表乞追復舊官從之德驤無文采頗以強直自  
任性褊躁多忤物不為士大夫所與有鄰開寶中舉進  
士不第其父既竄靈武意宰相趙普擠抑之時堂候吏  
胡贊李可度經職歲久或稱其請託受賕而祕書丞王  
洞與德驤同年登第有鄰每走謁洞洞多以家事委之  
一日洞令有鄰市白金半鉞因曰此令吾子知要與胡  
將軍蓋謂贊也時又有招應攝官三任詳由全者許投



牒有司即得召試錄用有鄰素與前攝上蔡主簿劉偉  
交游知偉雖嘗三攝而一任失其解由偉造偽印令其  
兄前進士僉書寫之因是得試遇銓遂具章告其事並  
下御史府按鞫有鄰出入贊家証其事多實獄具偉坐  
棄市洞等並決杖除名贊可度仍籍其家有鄰授祕書  
省正字由是累上疏密告人陰事俄被病白晝見偉入  
室以杖垂其背號呼聞于外數日而死

有終字道成以蔭補漢州司戶參軍時侯陟典選木彊

難犯選人聽署於廷無敢譁者有終獨抗言願為大郡  
治獄掾陟叱之曰年未三十安可任此官有終不為沮  
署萊蕪尉知監左拾遺劉祺視有終年少頗易之有終  
發其姦贓祺坐罪杖流海島以有終代知監事先是三  
司補吏為治官率以貲進多怨橫至是受署者憚有終  
率多避免太宗即位聞其名遣內侍伍守忠同掌監事  
且察其治迹守忠至裁周月即還奏有終彊濟之狀亟  
詔為大理寺丞會德驤任陝西轉運奏為解州通判特

許德驤不巡察是州有終入奏鹽池利害改贐善大夫  
令還權知軍事省通判太平興國六年遷殿中丞知密  
州徙淮南轉運副使時德驤主簿兩浙往往省于境上  
時人榮之雍熙中王師北征命為蔚州飛狐路隨軍轉  
運使入為鹽鐵判官歷戶部度支副使出知昇州淳化  
初就遷少府少監知廣州二年以女弟壻衛濯訟坐親  
累責授衡州團練副使奪章服俄丁外艱行及許田召  
歸入對起為都官員外郎歷度支鹽鐵副使復金紫時

以江南嶺外茶鹽價不一細民冒禁私販多陷重辟詔  
有終領江淮兩浙荆湖福建廣南路茶鹽制置使就出  
鹽產茶之地以便宜裁制使還改工部郎中知大名府  
不踰月復為少府少監徙知江陵李順之亂王師西征  
命與裴莊為峽路隨軍轉運使同知兵馬事調發兵食  
規畫戎事皆有節制師行至峽中遇盜格鬪且行且戰  
進至廣安軍壘瀕江三面樹柵會夜陰晦賊衆奄至鼓  
譟舉火士伍恐懼有終安坐櫛髮自若賊圍既合引奇

兵出其後擊之賊衆驚擾赴水死者無算就拜右諫議大夫知益州次簡州寓佛舍度賊必至命左右重閉召土人嚴更警備初夕間道而出賊圍守數重及壞寺入惟擊柝者在焉俄兼同招安使賊平移知許州改知并州真宗嗣位加工部侍郎代還知審刑院授戶部使咸平二年將巡師大名

按宋史真宗本紀載咸平二年十月二月帝親禦契丹甲寅駕發京師

甲子次大名本傳作三年誤今改

遣有終乘駟先詣澶州督納糧草車

駕還次德清軍會益州奏神衛戍卒以正旦竊發害兵

馬候轄符昭壽擁都虞侯王均為亂逐知州牛冕即日  
拜有終瀘州觀察使知益州兼川峽兩路招安捉賊事  
御廚使李惠洛苑使石普供備庫副使李守倫並為招  
安巡檢使給步騎八千命往招討又以洺州團練使上  
官正為東川都鈐轄西作坊使李繼昌為峽路都鈐轄  
崇儀副使高繼勳王阮並為益州駐泊都監供奉官閤  
門祗候孫正辭為諸州都巡檢使正月三日均率衆陷  
漢州進攻綿州旬日不能下趨劔門先是知劔州祕書

丞李士衡度寇必至城不能守悉徙官帑保劔門焚其倉廩及署榜招軍卒之流逸者得數十人已而賊果至士衡與劔門都監左藏庫副使裴臻逆擊之時風雪連日均衆無所掠惟食敗糟臻與戰斬首數千級賊衆疲劇宵遁還保益州士衡即馳騎入奏帝嘉之拜士衡度支員外郎臻崇儀使領峰州刺史仍舊職知蜀州供奉官閤門祇候楊懷忠聞變即調鄉兵會十一路巡檢兵刻期進討十七日懷忠率衆入益州焚城北門至三井

橋時均尚留劒門與賊將魯麻胡陣于江瀆廟前自晨  
至晡戰數合懷忠兵勢不敵退還所部懷忠部下多李  
順舊黨頗貪剽劫故敗績焉懷忠移文嘉眉七州調軍  
士丁男來會二月再攻益州時均方遣逆黨趙延順攻  
邛蜀懷忠逆與之戰賊稍退懷忠與轉運使陳緯麾兵  
由于城南門直入軍資庫與緯署其庫籩均衆皆銀槍  
繡衣為數隊分列于城中賊兵出通遠門與懷忠戰數  
合會暮懷忠復退軍笮橋背水列陣砦櫓木橋南以扞



邛蜀之路賊故不復能南畧自清水壩溫江金馬三道  
來攻櫛木砦出官軍後焚江原神祠斷邛蜀援路懷忠  
三路分兵以抗之斬首五百餘級驅其餘衆入阜江獲  
甲弩甚衆衆乘勝逐賊至益州南十五里砦于雞鳴原以  
俟王師均亦閉成都東門以自固是月有終等至令石  
普先與綿漢都巡檢張思鈞收復漢州進壁升僊橋賊  
出攻砦有終擊走之一日均開城偽遁有終與上官正  
石普率兵徑入官軍分剽民財部伍不肅賊閉關發伏

布牀榻於路口官軍不得出因為所殺有終等緣堞而  
墜李惠死之退保漢州益州城中民皆奔迸四出復為  
賊黨分騎追殺或囚繫之支解族誅以恐衆又脇士民  
僧道之少壯者為兵先刺手背次髡首次黥面給軍裝  
令乘城與舊賊黨相間有終署榜招之至則署其衣袂  
釋之日數百人三月進攻彌牟砦斬首千餘級復為賊  
所拒四月賊由升僊橋分路來寇併軍於東偏有終率  
兵逆擊大敗之殺千餘人奪其緞蓋金槍等物均單騎

還城有終遣其子奉禮郎孝若馳奏帝召孝若問敗賊之由笑謂左右曰均鼠竊爾雖嬰城自守計日可擒矣孝若因言嘗習武藝願改秩以効即補供奉郎俄以刑部員外郎馬亮為轉運使國子博士張志言副之供備庫副使張昫為綿漢都巡檢使楊懷忠又分所部砦於合水尾浣花等處樹機石設筰籬以拒之賊自升僊之敗徹橋塞門官軍進至清遠江為梁而渡有終與石普屯於城北門之西依壕為土山分設鹿角又得舊草場

造衝梯洞車攻具普專主之高繼勲張昫孫正辭攻城  
東上官正李繼昌王阮攻城西楊懷忠與巡檢殿直閻  
門祇候馬貴攻城南賊將趙延順盡驅兇黨以拒既而  
延順中流矢死又遣其黨丁重萬立城門上官軍射之  
殪每攻城輒會雨城滑不能上官軍及丁夫為洞屋以  
進賊又鑿地道出掩之溺濠中死者千餘軍勢小衄時  
方暑濕軍士多疾有終市藥他州療之是月詔洛苑使  
秦翰為兩川捉賊招安使有終與翰叶議於城北魚橋

又築土山八月克城北羊馬城遂設鴈翅敵棚覆洞屋以進逼羅城九月城北洞屋成賊對設敵樓以抗官軍有終遣卒焚之賊復築月城以自固有終募敢死士間道以入賊為藥矢中者立死卒皆蒙氈秉燧悉焚其望櫓機石先遣東西南北砦鼓譟攻城有終與石普分主洞屋以進普穴城為暗門門成賊攢戟於前無敢進者有二卒請行許以厚賞乃麾戈直衝之賊鋒稍却遂入城有終登城樓下瞰賊之餘衆猶砦天長觀前於文翁坊

密設礮架高繼勲白于馬亮請給稽秆油粃衆執長戟  
巨斧秉炬以進悉焚之楊懷忠焚其砦天長觀前追至  
大安門復敗焉是夕二鼓均與其黨二萬餘南出萬里  
橋門突圍而遁有終疑有伏遣人縱火城中詰朝與秦  
翰登門樓牙吏有受偽署官職者捕得立樓下傍積薪  
厝火其上索男子魁壯者令辨之曰某嘗受某職即令  
左右捽投火中自晨至晡焚死者數百人時謂冤酷均  
既走度合水尾由廣都畧陵榮趣富順監所過斷橋塞

路焚倉庫而去初有終遣懷忠領虎翼軍追之後二日石普既往以前軍為後援十月均至富順其將校以筏度江趨戎瀘蠻境朝廷每歲孟冬朔詔富順監具酒肴犒內屬蠻酋是日裁設具而均黨適至皆食焉聞懷忠追騎將至均心易之謂其黨曰速降懷忠令其衆負擔以行懷忠距富順六十里於楊家市少憩賊衆在後者邀戰懷忠遣騎士歷高原覘賊且語其左右曰縱賊度江後悔無及問石侯將至當以奇兵取之乃臨江列陣

擊之餘黨散走有拏舟將度江而遁者懷忠令張弩射之溺死甚衆懷忠張旗鳴鼙入城均方在監署中其衆多醉均窮蹙縊死虎翼軍校魯斌斬其首詣懷忠獲僭偽法物旌旗甲馬甚衆擒其黨六千餘人逆徒殲焉懷忠旋軍出北門普衆方至奪均首馳歸成都梟于北市均本隸開封散從直後補軍校初神御軍之戍成都者以均及董福分二指揮以領之福御衆有法部下皆優足均縱其下飲博軍裝亦以給費是歲車駕幸河朔符



昭壽與牛冕大閱於東郊蜀人趨視之二軍衣服鮮敝  
不等均衆因是慙憤益州知州與鈴轄二廨並禁旅為  
牙隊歲除冕以酒肴犒部士而昭壽既驕恣復肆侵虐  
冕亦寬弛無政故詰朝合起為亂神衛卒既殺昭壽是  
日成都官吏方相與賀正聞變皆奔竄牛冕與轉運張  
適絕城而出惟都巡檢使劉紹榮冒刃格鬪既而衆寡  
不敵叛卒尚未有主或欲奉紹宗為帥者紹宗攝弓罵  
曰我燕人也比棄鄉土來歸本朝豈能與汝同逆汝亟

殺我我肯負朝廷哉衆未敢動監軍王澤與均適至乃  
謂均曰汝所部為亂盍自往招安均既往叛卒即擁之  
為王紹榮自經死均僭號大蜀改元化順署置官稱設  
貢舉以張錯為謀主錯本名美太原舊卒後為神衛小  
校狡獪嘗歷戰陣粗習陰陽以熒惑同惡故勸均為亂  
均實慙悞無謀嘗言官軍若至我當先路出迎自陳被  
脅之狀錯聞之擇軍中子弟署寄班以防守均令不與  
人接見官軍圍城每射箭招誘及令均子弟至城下均

皆不之知得箭書錯悉焚之自起至敗所守止一城而已均初署親軍為天降虎翼後果為虎翼軍所殺賊既平遣承受供奉官楊崇勲乘傳告捷賜崇勲錦袍銀帶器幣有終加保信軍節度觀察留後以秦翰為內園使恩州刺史石普為益州團練使高繼勲王阮並為崇儀使孫正辭為內殿崇班李繼昌為樊州刺史張昫為供備庫使楊懷忠為供備庫副使馬貴為供奉官是役也懷忠之功居最為石普所忌朝廷微聞之遣寄班安守

忠按視戰所盡得其功狀以故懷忠復遷崇儀使領恩州刺史四年有終代還命為涇原儀渭鎮戎路都部署

辭不拜改知永興軍府

按長編載有終以平賊功進保信軍留後代還知永興軍宋史

本傳祇云懷忠遷崇儀使領恩州刺史有終代還改知永興不載以功進留後事

徙秦州景德

初徙為并代副都部署契丹入侵帝幸澶淵詔有終率

所部由土門抵鎮州與大兵會既而王超桑贊逗撓無

功惟有終赴援威聲甚振河北列城賴其雄張既而契

丹修好命還屯所就判并州召拜宣徽北院使檢校太

保二年暴疾卒年五十九贈侍中錄其子孝若為內殿  
崇班閣門祇候孝傑為內殿崇班孝緒為供奉官孝恭  
為侍禁親族門客給事輩遷補者八人有終個儻自任  
不拘小節有幹局沈敏善斷不畏彊禦輕財好施歷典  
藩閫能撫士卒豐於宴犒官用不足則傾私帑及權錢  
以給之家無餘財奉身甚薄常所御者銅鞍勒馬而已  
第在崇仁里者德驤所創有終在蜀常貸備用庫錢數  
百萬奏納其第償之優詔蠲免為宣徽使特給廉鎮公

用錢歲二千貫身沒之日宿負猶不啻千萬官為償之  
王繼英在樞密頗忌有終進用屢言其在蜀及守邊厚  
費以收士卒心真宗不之信卒保護焉

孝先字子思有鄰子舉進士試祕書省校書郎知天長  
縣以衛濯訟其內亂除籍配均州後復知宛邱縣李繼  
隆判陳州薦其能加試大理評事契丹入侵真宗幸大  
名孝先以部芻糧河北首至行在擢太常寺奉禮郎王  
均反益州隨季父有終進討孝先率先鋒與賊戰升仙

橋斬首數百得均金槍黃織以獻改將作監丞李繼遷  
陷靈州朝廷調兵軍費多出於民關內大擾孝先請益  
募商人入粟塞下償以茶鹽召對稱旨命馳驛陝西與  
轉運使鄭文寶議立規畫事多施行累遷尚書屯田員  
外郎嘗請置三司拘收司以檢天下財利出入之數詔  
如其請知興元府坐保任失實降通判華州徙知鄆州  
宰相寇準舉換內園使知貝州會慈州民張熙載詐稱  
黃河都總管籍並河州郡芻糧數至貝州孝先覺其姦

捕繫獄孝先欲因此為奇功以動朝廷迫司理參軍紀瑛教熙載偽為契丹謀者部送京師樞密院按得孝先所教狀謫澤州都監後遷領軍衛大將軍昭州刺史分司西京卒子簡夫

簡夫字太簡隱居不仕康定中樞密使杜衍薦之召見以祕書省校書郎簽書秦州觀察判官時三白渠久廢京兆府遂薦簡夫治渠事先時治渠歲役六縣民四十日用稍木數百萬而水不足簡夫用三十日稍木比舊



三之一而水有餘知坊州徙閬州用張方平薦知雅州  
既而辰州蠻酋彭士義入寇三司副使李參侍御史朱  
處約安撫不能定繼命簡夫往至則督諸將進兵築明  
溪上下二砦據其險要拓取故省地石馬崖五百餘里  
士義內附擢三司鹽鐵判官以疾知號同二州累遷尚  
書職方員外郎卒錄其子爵臣為郊社齋郎

王超趙州人弱冠長七尺餘太宗尹京召置麾下及即  
位以御隸龍直淳化二年累遷至河西軍節度使殿前

都虞候真宗嗣位以翊戴功加檢校太傅領天平軍節度咸平二年大閱禁兵二十萬於東郊超執五方旗以節進退帝御戎幄觀之面賜褒獎從幸大名與都虞候張進並為先鋒都大點檢傳潛逗撓得罪以超為侍衛馬步軍都虞候鎮州行營都部署又帥鎮定高陽關三路與契丹戰于遂城西俘馘二萬計斬其裨王騎將十五人李繼遷陷清遠軍超將西面行營之師禦之徙師永興軍宰相言超材堪將帥遂以超帥定州路行營王

繼忠副之尋加鎮定高陽關三路都部署密遣中使賜以御弓矢許便宜從事加開府儀同三司檢校太傅咸平六年遼師大入超召鎮州桑贊高陽關周瑩率兵會定州瑩以非詔旨不至遼兵圍望都超贊率兵赴之陣于縣南六里繼忠在陣東偏契丹出其背遮絕糧道人馬乏困繼忠馳前與契丹戰超贊遂旋師繼忠孤軍沒馬帝即遣劉承珪李允則馳往察退衄之狀且言鎮州副部署李福拱聖軍都指揮使王昇當戰先旋福坐削

籍流封州昇決杖配隸瓊州景德初帝親巡澶淵召超  
赴行在復緩師期契丹遂深入會南北通好故薄其責  
止罷超三路帥為崇信軍節度使徙知河陽又移鎮建  
雄知青州卒贈侍中再贈尚書令追封魯國公謚武康  
超為將善部分御下有恩與高瓊同典禁旅嘗休假他  
適過營壘軍校不時將迎瓊即命筆罰超以為非公行  
不當加罪人稱其恕然臨事寡謀拙於戰鬪子德用  
德用字元輔幼從父補衙內都指揮使至道二年分五

路出兵討李繼遷超帥師六萬出綏夏德用年十七為  
先鋒將萬人戰鐵門關斬首十三級俘掠畜產以數萬  
計進師烏白池諸將多失道不至敵甚銳超按兵不進  
德用請乘之以精兵五千轉戰三日敵勢却德用曰歸  
師迫險必亂乃領兵距夏州五十里絕其歸路下令曰  
亂行者斬一軍肅然超亦為之按轡繼遷躡其後左右  
望見隊伍甚嚴整莫敢近超撫其背曰王氏有子矣累  
遷內殿崇班以御前忠佐為馬軍都軍頭出為邢洺磁

相巡檢盜張洪霸相聚界上吏不能捕德用以羶車載  
勇士詐為婦人飾過邯鄲賊果來邀勇士奮出悉擒之  
徙督捕陝西東路盜賊相戒曰此禽張洪霸者皆相率  
逃去為環慶路指揮使尋以奏事忤旨責授鄆州馬步  
軍都指揮使天聖初以博州團練使知廣信軍城壞久  
不治德用率禁軍增築之有詔褒諭召還又為并代州  
馬步軍副都總管遷殿前都虞候步軍副指揮使歷桂  
州福州觀察使章獻太后臨朝有求內降補軍吏者德

用曰補吏軍政也不可與太后固欲舉之卒不奉詔乃止太后崩有司請衛士坐甲德用曰非故事也不奉詔仁宗閱太后閣中得德用前奏軍吏事竒之以為可用拜檢校太保簽書樞密院事德用謝曰臣武人幸得以馳驅自効賴陛下威靈待罪行間足矣且臣不學不足以當大事帝遣使者趣入院遂為副使久之以奉國軍節度觀察留後同知院事遷知院歷安德軍加檢校太尉定國軍節度使宣徽南院事趙元昊反德用請自

將討之不許德用狀貌雄毅面黑頸以下白皙人皆異之言者論德用貌類藝祖

按東都事畧作翰林學士蘇紳語

御史中丞

孔道輔繼言之且謂德用得士心不宜久典機密遂罷為武寧軍節度使徐州大都督府長史有言德用市馬於府州者上其券乃市於商人者言者猶不已降右千牛衛上將軍知隨州州置判官家人皆惶恐德用舉止言色如平時惟不接賓客而已徙知曹州或謂德用曰孔中丞害公今死矣德用曰中丞言官豈害我者朝廷



亡一忠臣可惜也起為保靜軍節度觀察留後知青州  
改澶州陝西用兵久無功契丹遣劉六符來求復關南  
地以兵壓境德用見帝流涕言臣前被罪陛下赦而不  
誅今不足辱命帝慰勞曰河北方警藉卿鎮撫之又賜  
手詔慰勉拜保靜軍節度使歲大熟六符見德用拜曰  
此公仁政所及也徙真定府定州路都總管還奏事復  
以宣徽南院使判成德軍未行徙定州路都總管日訓  
練士卒久之士殊可用契丹使謀者來覘或請捕殺之

德用曰第舍之彼得實以告是服人之兵以不戰也明日大閱援枹鼓之士皆踊躍進退坐作終日不戮一人乃下令具糗糧聽吾鼓聲視吾旗幟所向覘者歸告契丹謂漢兵將大入既而復議和遂徙陳州又徙河南不行入奉朝請出判相州拜同中書門下平章事判澶州徙鄭州封祁國公還為會靈觀使德用素善射雖老不衰侍射瑞聖園辭曰臣老矣不能勝弓矢帝再三諭之持二矢未發帝顧之使必中乃收弓矢謝一發中的再

發又中帝笑曰德用欲中即中爾孰謂老且衰乎賜襲衣金帶加檢校太師復判鄭州徙澶州改集慶軍節度使封冀國公皇祐三年上疏乞骸骨以太子太師致仕大朝會綴中書門下班德用將家子習知軍中情偽善以恩撫下故多得士心雖屢臨邊境未嘗親矢石督攻戰而名聞四夷閭閻婦女小兒皆呼德用曰黑王相公帝嘗遣使問邊事德用曰咸平景德中賜諸將陣圖人皆死守戰法緩急不相救以至于屢敗誠願不以陣圖

賜諸將使得應變出奇自立異効帝以為然德用雖致仕乾元節上壽預班廷中契丹使語譯者曰黑王相公乃復起耶帝聞之起為河陽三城節度使同中書門下平章事判鄭州至和元年遂以為樞密使命入謁拜明年富弼相契丹使耶律防至德用與防射玉津園防曰天子以公典樞密而用富公為相將相皆得人矣帝聞之賜弓一矢五十後封魯國公求去位至六七乃以為忠武軍節度使景靈宮使又以為同羣牧制置使有詔

五日一會朝聽子孫一人扶掖卒年七十九贈太尉中書令謚武恭加賜其家黃金德用諸子中咸融最鍾愛晚年頗縱之多不法後更折節自飭官至左藏庫使眉州防禦使

欽定續通志卷三百十八

欽定四庫全書

欽定續通志卷三百十九

列傳

宋 二十三

傅潛 張照九

王漢忠

王能

張凝

魏能

陳興

許均

李重貴

呼延贊

劉用

耿全斌

周仁美

田紹斌

楊瓊

錢守俊

徐興

王杲

白守素

張思均

傅潛冀州衡水人少事州將張廷翰太宗在藩邸召置左右即位隸殿前左班歷東西班指揮使征太原一日再中流矢又從征范陽先至涿州與契丹戰生擒五百餘人翌日上過其所見積尸及所遺器仗嘉歎之師旋擢為內殿直都虞候帝對樞密言潛從行有勞賞簿三

遷至日騎天武左右廂都指揮使領雲州防禦使雍熙  
二年命大將曹彬北征以潛為幽州道行營前軍馬步  
軍都指揮使師敗于拒馬河責授右領軍衛大將軍自  
檢校司徒降為右僕射仍削功臣爵邑明年起為內外  
馬步都軍頭領潘州防禦使自端拱初至至道中數被  
遷轉出為延州路都部署改鎮州真宗即位領忠武軍  
節度召還咸平二年復出為鎮定高陽關三路行營都  
部署契丹大入緣邊城堡悉飛書告急潛麾下步騎凡



八萬餘咸自置鐵撾鐵捶爭欲奮擊潛畏懦無方畧閉門自守將校請戰者則醜言罵之無何契丹破狼山砦悉銳攻威虜畧寧邊軍及祁趙游騎出邢洺鎮定路不通者踰月朝廷屢間道遣使督其出師會諸路兵合擊范廷召桑贊秦翰亦屢促之皆不聽廷召等怒因詬潛曰公恒怯乃不如一嫗爾潛不能答都鈐轄張昭允又屢勸潛潛笑曰敵勢如此吾與之角適銍吾銳氣耳然不得已分騎八千步二千付廷召等於高陽關逆擊之

仍許出兵為援洎廷召等與契丹血戰而潛不至康保  
裔遂戰死及車駕將親征又命石保吉上官正自大名  
領前軍赴鎮定與潛會潛卒逗遛不發致敵騎犯德棣  
渡河湊淄齊劫人民焚廬舍帝駐大名而邊捷未至且  
諸將屢請益兵潛不之與有戰勝者潛又抑而不聞帝  
繇是大怒乃遣高瓊單騎即軍中代之令潛詣行在至  
則下御史府命錢若水同劾按一夕獄具百官議法當  
斬從駕羣臣多上封請誅之帝貸其死詔削奪潛在身

官爵并其家屬長流房州潛子內殿崇班從範亦削籍  
隨父流所仍籍沒其貲產五年會赦徙汝州景德初起  
為本州團練副使改左千牛衛上將軍分司西京大中  
祥符四年車駕西巡至洛因命從駕還京遷左監門大

將軍還其宅久之判佐金吾街仗天禧元年卒

按宋史此上有

王繼忠傳考繼忠官定州路副都部署戰陷契丹賜名耶律顯忠又改名忠信歷封王爵其後繼忠附表力請召還中朝真宗以誓書約各無所求賜詔諭意史稱南北息兵繼忠與有力焉與甘心委質二姓者有別且遼

史已為立傳其與契丹戰事

亦附見王超傳中此從刪

張昭允字仲孚衛州人以父秉蔭試大理評事潘美妻以女奏換右班殿直以久次遷通事舍人端拱初契丹內侵命為雄州監軍敵騎乘秋掠境上昭允與知州田仁朗選銳卒襲其帳敗走之進西上閤門副使提總左右藏金銀錢帛昭允以諸州絹常度外長數尺請裂取付工官備他用歲獲羨餘既而士卒受冬服度之不及程出怨言昭允坐免官俄起為崇儀副使累遷西上閤門使河西馬步軍鈐轄屯石州會計李繼遷王超出夏

綏州路領後陣超深入數百里踰白池道阻糧絕昭允以所部援之戎人大敗真宗即位以昭允章懷皇后姊婿頗被親信咸平二年命為鎮定高陽關行營馬步都鈐轄時傳潛為都部署畏愜城守昭允屢勸其出兵潛按兵不動潛既得罪昭允亦削奪官爵長流道州景德二年起為楚州團練副使改右神武將軍大中祥符元年卒昭允喜筆札習射曉音律子正中居中

按宋史此下有戴興

傳無事蹟足錄今從刪

王漢忠字希傑徐州彭城人少豪蕩有膂力形質魁岸  
善騎射節帥高繼冲欲召至帳下漢忠不往因毆里中  
少年遂西至京師太宗在藩邸召見奇其材力置左右  
即位補殿前指揮使遷內殿直都知從征太原先登流  
矢中眸戰益急帝壯之端拱初累遷侍衛馬軍都虞候  
領洮州觀察使高陽關副都部署契丹南侵漢忠合諸  
軍擊敗之淳化中徙定州遷殿前都虞候真宗即位自  
中山召歸復出為高陽關都部署進領威塞軍節度咸

平三年契丹掠中山漢忠率諸將陣于野契丹遁追斬  
甚衆獲其貴將加殿前副都指揮改領保靜軍節度五  
年罷西面經畧使命漢忠為邠寧環慶兩路都部署李  
允正宋沆為鈐轄領戍兵二萬五千人委漢忠分道控  
制數月召還坐違詔無功責左屯衛上將軍出知襄州  
常奉外增歲給錢二百萬未上道暴得疾卒贈太尉漢  
忠有識畧軍政嚴肅性剛果不務小節輕財樂施好讀  
書頗能詩喜儒士侍賓佐有禮名稱甚茂以是自矜尚

羣帥多不悅之從吉後因詣闕上書坐除名配隨州

王能廣濟定陶人初事州將袁彥太宗在晉邸召置左右即位補內殿直累遷至前右班都虞候兼御前忠佐馬步軍都軍頭咸平初自捧日右廂都指揮使出為濟州團練使知靜戎軍建議決鮑河斷長城口北注雄州塘水為戎馬限方舟通漕以實塞下又開方田盡靜戎順安之境契丹來侵能擊走之初真宗詢軍校勤勇者委以方面因語宰相曰聞王能魏能頗宣力公家陳興



張禹班亦有聲于時才固難全拔十得五亦有助也景德初擢本州防禦使與魏能張凝並命出為邢洛路都部署俄改鎮定高陽關三路行營都部署大中祥符二年詔合鎮定兩路部署為一命能領之明年召入為侍衛步軍副都指揮使領曹州觀察使汜汾陰留為京城巡檢兼留司殿前司事禮成加領振武軍節度復為鎮定副都部署兼知定州八年表求入覲許之先是節帥陞見必飲於長春殿掌兵者則不預至是特令用藩臣

例有司言能既赴坐則殿前馬軍帥皆當侍立繇是特  
令諸帥預坐自是掌兵者率以為例天禧二年制授彰  
信軍節度罷軍職赴鎮以地近其鄉里寵之也明年卒  
年七十八贈太尉錄其子守信等官

張凝滄州無棣人少有武勇倜儻自任鄉人趙氏子以  
材稱凝恥居其下因挾弓與角勝負約築土百步射之  
凝發一矢洞過矢激十許步抵大樹而止觀者歎服節  
帥張美壯之召置帳下太宗在藩邸聞其名以隸親衛

即位補殿前指揮使稍遷散祇候班都虞候淳化初以其有材幹與王斌王憲並授洛苑使凝領繡州刺史出為天雄軍駐泊都監移貝州改高陽關行營鈐轄六宅使真宗踐祚加莊宅使遷北作坊使咸平初契丹南侵凝率所部兵設伏於瀛州西出其不意腹背奮擊挺身陷敵凝子昭遠年十六從行即單騎疾呼突入陣中所向披靡凝以出明年契丹兵大至車駕幸大名凝與范廷召於莫州東分據要害斷其歸路契丹宵遁凝縱

兵擊之盡奪所掠生口資畜邠寧環慶靈州路副部署  
兼安撫使時斥堠數擾轉運使劉綜懼飛輓不給問計  
於凝凝曰今當深入因敵資糧不足慮也乃自白豹鎮  
率兵入敵境生擒賊將燒蕩三百餘帳芻糧八萬斬首  
五千餘獲牛馬器甲二萬降九百餘人慶州蕃族和爾  
嘉木等桀黠難制凝襲破之又熟戶與生羌錯居頗為  
誘脅凝引兵至八州原分水嶺柔遠鎮降和卓等百七  
十餘族合四千戶邇境獲安就加寧州團練使景德初

遷本州防禦使代楊嗣為定州路行營副部署徙保州  
駐泊又兼北面安撫使時王超為總帥以大兵頓中山  
朝議擇凝與魏能田敏楊延昭分握精騎俟契丹至深  
入以率其勢超嘗請四人悉隸所部帝以本設奇兵撓  
敵之心腹若復取裁大將則無以責效乃令凝等不受  
超節度時魏能逼撓退保城堡衆皆憤悱貴讓能凝獨  
默然或問之凝曰能粗材陰懷既不為諸君所容吾復  
切言之使其心不自安非計也帝聞而嘉其有識車駕

觀兵澶淵凝率衆抵易州既而契丹受盟北歸所過猶  
侵剽不已遂以凝為緣邊安撫使提兵躡其後契丹乃  
不敢掠奪改高陽關部署明年議勞就加殿前都虞候  
卒凝忠勇好功名累仕西北善訓士卒繕完器仗前後  
賞賜多以犒師家無餘資京師無居第真宗悼惜之贈  
彰德軍節度使遣中使護喪還京官給葬事厚恤其家  
子昭遠

魏能鄆人出應募隸雲騎軍後選補日騎左射又隸殿

前班七遷散員左班都知舊將諸軍辭見才器勇敢或  
迥異出羣者許將校交舉以任使毋枉其志能時未有  
舉者太宗曰能材勇過人朕可自保由是進用之端拱  
二年加御前忠佐馬軍副都軍頭歷殿前左班都虞候  
領溪州刺史加秩轉馬步軍都軍頭咸平三年真拜黃  
州刺史明年為鎮定高陽關三路前陣鈐轄五年知鄭  
州團練使復任為虜軍契丹入侵能當城西與諸將合  
戰無憚色大敗其衆斬首二萬級契丹統軍鐵林公來

薄陣能發矢殪之并其家十五人奪甲馬兵械益衆契  
丹復入能率州軍逆戰南關門遣其子政與都監劉知  
訓間道絕敵行勢戰數十合破走之獲器甲十八萬契  
丹嘗謀內侵能偵知即發兵逆擊之擒酋即殄滅殆盡  
六年改威虜軍部署知軍使能建言戍卒逸邊境者請  
沒其妻與子為奴婢帝慮嚴迫聽緩期自新違以法坐

會浚靜戎順安軍營田河道以扼敵衝

按長編載咸平六年七月甲寅

對輔臣于便殿帝曰今河北已屯大兵而邊將屢奏敵  
未有隙且聚軍虛費則民力何以充給朕切思之不若



因有所置制以為控扼之利靜戎順安軍先開營田河道可以扼黑廬口三臺小李路又得通漕極邊當令乘此閒浚使及軍城敵或挽我役即合兵擊殺此第言浚順安軍營田河道不及靜戎今據增徙莫州

路部署時石普屯兵順安之西境詔能與楊延昭田敏犄角為備景德初破契丹于長城口追北遘陽山復以所部禦寇于順安召拜防禦使復出為寧邊軍路部署詔推能果略再任以威虜使副精兵伺敵動止邊人百餘掠居民樹蕃僧為帥能與田敏楊勲合兵設伏擊之擒其帥賊來逼城能出兵拒之少餉即卻陣入城張凝

以兵擊卻之會詔能與凝領偏師分道入幽易牽制契丹之勢能畏愼不前且不戢所部多俘奪人馬俄徙屯定州及遣凝躡迹北行能靡險自度無功心愧出怨辭以訕間朝議謂能剛猾少檢不可專任乃命綦政敏為鈐轄俾同職焉明年師還大名時王能曹瑑各領兵歸闕鈐轄孫全照遣能瑑之師由北門分道先入能師繼之能怒全照後已疾驅競入全照射之能奪全照弓以去翌日詣判府王欽若誣全照射傷押隊閤門楊凝嗣

頗紛競全照密疏能摧兵退縮師緩失期及師旋不整  
狀帝怒其逗遛會全照奏乃質實于張凝白守素等即  
責授右羽林將軍出為鞏縣都監明年以自陳特改官  
右驍騎大將軍號州都監累遣加領康州團練使大中  
祥符八年卒錄其子正為閣門祇候靖為三班奉職

陳興澶州衛南人開寶中應募為卒得隸御龍右直端  
拱中累遷御前忠佐步軍副都軍頭王超為并代部署  
奏興隨軍遣戍汾州明年李繼隆行營河西興隸麾下

克綏夏銀州繼隆命權知夏州尋還屯所受詔提轄河東緣邊城池器甲芻糧至道初繼隆荐其材幹召補御龍弩直都虞候咸平初為馬軍都軍頭領茂州刺史三年真授憲州刺史知霸州會城綏州詔與錢若水往視利害事具若水傳又徙涇原儀渭鎮戎軍部署上言鎮戎軍去渭州瓦亭砦七十餘里中有二堡請留兵三百戍之俄與曹瑋秦翰領兵抵鎮戎軍西北烏延鹹泊川掩擊蕃寇章察族帳獲甚衆繼遷所遷哈努勒族往歲

鈔劫靈州援糧恃險與衆尤桀黠難制復與秦翰等合兵進討窮其窠穴盡焚掘其害藏復詔褒之仍加賜賚景德三年遷本州團練使知徐州興起行伍有武畧所至頗著聲績真宗言軍校之材必以興為能大中祥符初召為神龍衛四廂都指揮使領登州防禦使出為邠寧環慶路副都部署兼知邠州坐擅釋劫盜罷軍職改徐州防禦使知懷州六年卒

許均開封人建隆中應募為龍捷卒征遼州以初補武

騎十將開寶中遷武騎副兵馬使從曹彬征金陵率衆陷水砦流矢貫手改本軍使從征河東攻隆州城先登陷之中八創遷副指揮使前後屢被賞賚出屯杭州妖僧紹倫結黨為亂均從巡檢使周瑩悉擒殺之端拱初補指揮使從李繼隆秦翰赴夏州擒趙保忠令均率兵衛守改龍衛第四指揮使俄屯夏州賊來犯境一日十二戰走之又從石普擊賊于原州牛欄砦普表上其功遷第三軍指揮使咸平初以御前忠佐馬軍都軍頭戍

秦州王均之亂遣乘傳入蜀隸雷有終麾下守魚橋門  
又從秦翰追殺賊黨於廣都降其衆七十餘驛召授東  
西班牙都虞候領順州刺史五年稍遷散員都虞候嘗召  
見訪以北面邊事翌日真拜磁州刺史深州兵馬鈐轄  
六年改涇州駐泊部署數月知鎮戎軍嘗出巡警至隴  
山木峽口真宗以其無故離城慮有狂寇奔哭詔書戒  
敕俄以其不明吏治用曹瑋代之徙為邠州駐泊部署  
改永興軍部署車駕將幸澶淵詔均與知府向敏中及

鳳翔梁鼎同提總陝西諸州巡檢捕盜事時有王長壽者本亡命卒聚徒百餘是春抵陳留剽劫縣民捕之不獲朝廷遣使益兵逐之澶濮間會契丹南侵夾河民庶驚擾長壽結黨愈衆人皆患之均至胙城長壽擁衆五千餘人縣鈔掠均部下徒兵楊袒與關均以方畧誘之生擒長壽斬獲其黨皆盡帝以方禦敵未欲因捕賊獎均但賞均部下卒被傷者賜帛遷級焉明年追叙前勞擢為本州團練使尋出知代州四年均被疾以米銳代



還未至而均卒錄其子懷忠為奉禮郎懷信為侍禁幼

子懷德自有傳

按宋史此下有張進傳無事蹟足錄今從刪

李重貴孟州河陽人姿狀雄偉善騎射少事壽帥王審琦頗見親信以甥妻之補合流鎮將鎮有羣盜以其尚少謀夜入劫鈔重貴知之即築柵課民習射盜聞之潰去太宗在藩邸知其勇幹召隸帳下即位補殿前指揮使累遷捧日右廂都指揮使領蠻州團練使至道二年出為衛州團練使未行會命將五路討李繼遷以重貴

為麟府州濁輪砦路都部署得對便殿因言賊居沙磧中逐水草收蓄無定居便戰鬪利則進不利則走今五路齊入彼聞兵勢大甚不來接戰且謀遠遁欲追則人馬乏食將守則地無堅壘賊既未平臣輩何顏以見陛下太宗善之出御劍以賜又累遣使撫勞既而諸將果無大功及還命為代并副都部署真宗即位加本州防禦使徙高陽關行營副都部署咸平二年契丹南侵議屯兵楊曠張凝領先逢遇敵重貴率策應兵酣戰全軍

而還范廷召自定州至遇契丹兵交戰康保裔大陣為敵所覆重貴與凝赴援腹背受敵自申至寅力戰却敵時諸將頗失部分獨重貴與凝全軍還屯凝議上將士功狀重貴喟然曰大將陷沒而吾曹計功何面目也帝聞而嘉之明年以勞進階及食邑徙知貝州召至勞問復遣入郡是冬徙滄州駐泊副都部署兼知州事以疾求還京就醫藥既愈連為刑州天雄二部署又知冀州景德初車駕幸澶淵召還為大內都部署明年知鄭州

州以疾甚授左武衛大將軍領潘州防禦使改左羽林軍大將軍致仕大中祥符三年卒

呼延贊并州太原人少為驍騎卒太祖以其材勇補東班長入承旨遷驍雄軍使從王全斌討西川身當前鋒中數創以功補副指揮使太平興國初太宗親選軍校以贊為鐵騎軍指揮使從征太原先登棄城及堞而墜者數四面賜金帛獎之七年從崔翰戍定州翰言其勇擢為馬軍副都軍頭稍遷內員寮直都虞候雍熙四年

加馬步軍副都軍頭嘗獻陣圖兵要及樹營砦之策求  
領邊任召見令之作武藝贊具裝執鞬馳騎揮鉄鞭棗  
櫟旋繞廷中數四又引其四子必興必改必求必顯以  
入迭舞劒盤樂賜白金數百兩及四子衣帶端拱二年  
領富州刺史俄與輔超並加都軍頭淳化三年出為保  
州刺史冀州副都部署至屯所以無統御材改遼州刺  
史又以不能治民復為都軍頭加康州團練使咸平二  
年從幸大名為行宮内外都巡檢真宗嘗補軍校皆叙

已功或至謹譁贊獨進曰臣月奉百千所用不及半忝  
幸多矣自念無以報國不敢更求遷擢將恐福過災生  
再拜而退衆嘉其知分三年元德皇太后園陵命掌護  
儀衛及還而卒贊勇有胆驚悍輕率常言願死於敵徧  
文其體為赤心殺賊字至於妻孥僕使皆然諸子耳後  
別刺字曰出門忘家為國臨陣忘死為主及作破陣刀  
降魔杵鐵折上巾兩旁有刃皆重十數斤絳帕首乘騅  
馬服飾詭異性復鄙誕不近理盛冬以水沃孩幼冀其

長能寒而勁健其子嘗病贊刲股為羹療之贊卒後擢  
必顯為軍副都軍頭

劉用相州人善騎射事太宗于藩邸即位補軍職累遷  
捧日都指揮使李順亂蜀為西路行營鈐轄賊平遷祈  
州刺史至道初為河西烏百池都鈐轄著戰功改高陽  
關副都部署真宗即位加本州團練使并州副都部署  
咸平中復為高陽關副都部署時烽堠數警用建議益  
邊兵俟其南牧即率驍銳出東路以牽制其勢因圖上

地形帝召宰相閱視可其奏且令轉運使於保州威虜  
靜戎順安軍預備資糧六年命將三路出師扞敵詔用  
與劉漢凝田思明領兵五千由東路會石普孫全照犄  
角攻之未幾換鎮州副部署景德初為邢州部署車駕  
北征用以城守之勞進爵邑歷知齊陳潞三州大中祥  
符二年卒

耿全斌冀州信都人父顯懷順軍校全斌少豐偉顯携  
謁陳搏搏謂有藩侯相顯戍西蜀全斌往首乘舟沂江



夜大風失纜漂七十里至曙風未止舟忽泊岸人頗異  
之後游京師屬太宗在藩邸全斌候拜于中衛自荐材  
幹得召試武藝以善左射隸帳下即位補東班承旨稍  
遷驍猛副兵馬使從征太原還遇契丹于蒲陰追擊至  
徐河因據水口要害遷補日騎副兵馬使雲騎軍使屯  
瀛州與契丹戰所乘馬兩中流矢死凡三易乘戰不却  
契丹為引去端拱初擊蕃部于宥州敗之累轉馬步軍  
都軍頭全斌在軍中有能名真宗嘗召問邊事全斌口

陳利害甚稱旨因謂輔臣曰元澄鄭誠耿全斌人多稱之觀其詞氣若有志操止在宿衛無以見其才宜以邊郡試之遂拜雄州刺史知深州徙石隰部署以備河西繼遷死全斌率兵入伏落關誘蕃部來歸者數千人俄知安肅軍嘗繪山川險易為圖以獻契丹來侵自山北抵河澣全斌遣子從政焚橋砦分率精兵擊走之改冀州刺史高陽關鈴轄擢從政為侍禁寄班祇候大中祥符初封禪泰山以為濮州鈴轄其年還京師卒

周仁美深州人開寶中應募隸貝州驍捷軍關南李漢超選備給使屢捕獲契丹諜者從漢超戰于西嘉山身中重創補隊長漢超上其功隸殿前班遷御前忠佐馬軍副都軍頭戍環州時駕卜雅爾鶻累歲為寇仁美與陳德玄宋思恭破之發戎族困害以餉師又與思恭討茂車春濟達至道初舒瑪爾弩卜雅爾鶻族復叛德玄令仁美提兵撫揖之仁美謂石昌鎮主和文顯曰此賊不除邊患未弭因厚設歡酒召酋長長十八人縛送州

獄自是諸族懼畏二年又與馬紹忠白守榮田紹斌部  
芻糧趣清遠軍仁美為先鋒至岐子平遇賊擊走之明  
日又戰于蒲洛河自已至戍戰數十合進壁乾紹忠  
守榮皆敗走紹斌退止蒲洛獨仁美所部不滿三千身  
中八創獲芻糧官吏直抵清遠紹斌繼至深歎其勇幹  
表上其功時運糧民道路被傷者相繼仁美領徒援護  
悉抵環州又遇虜於橐駝路擊走之先是諸蕃每貢馬  
京師為繼遷邀擊仁美領騎士為援賊不敢犯補澶州

龍為軍都虞候部署李繼龍奏留麾下選軍中伉健者  
千人令仁美領之屢入敵境戰有功俄還澶州召見會  
令諸軍射仁美自陳筋力未衰願對殿廷發二矢帝許  
之既而前奏曰臣老于戎門多戍外郡罕曾入覲京闕  
前後征行體被三十餘創今日得對萬乘千載之幸儻  
或備員宿衛立殿廷下一日足矣帝顧傅潛而笑潛亦  
稱其武幹力留補馬步軍副都軍頭潛屯北面常以自  
隨契丹攻蒲陰仁美領萬騎解其圍又從王超屯鎮定

儀渭累遷龍衛軍都指揮使領順州刺史復屯鎮定時  
州有亡命卒聚盜剽村閭為患王超委仁美招捕仁美  
選勇敢卒詐亡命趣賊所得其要領即自往諭以禍福  
留賊中一日超忽失仁美求之甚急詰旦仁美至具道  
其事乃出庫錢付仁美為賞不數日賊悉降凡得二百  
餘人以隸軍籍大中祥符八年擢為龍神衛四廂都指  
揮使領獎州防禦使遷捧日天武四廂都指揮使改領  
端州防禦使權京新城內都巡檢先是巡兵捕亡卒盜

賊不獲皆有罰而獲者無賞仁美因差立賞格以聞詔  
從其請天禧三年卒

田紹斌汾州人仕河東劉鈞為佐聖軍使戍遼州顯德  
四年領五十騎來歸周鈞屠其父母家屬世宗召補驍  
武副指揮使太祖即位隨崔彥進征李筠攻大會砦破  
之以功遷龍捷指揮使又敗筠于澤州茶碾村筠退保  
澤州紹斌鑿濠圍守流矢中左目前軍部署韓令坤以  
其事間及太祖召見于潞州紹斌殺晉軍奪其鎧甲益

衆又從討李重進下荆湖平嶺南皆有功討蜀隸大將  
劉廷讓麾下會全師雄寇神泉紹斌率所部敗其黨數  
千時漢劍道梗因賴以寧凡在蜀三歲剽盜殄除累遷  
龍捷都虞候嘗盜官馬貿直盡償博進事發獄具有司  
引見講武殿紹斌稱死罪太祖知其驍勇釋之且密賜  
白金會征江南擇諸軍借事得五百人為步闕軍令紹  
斌領之及率雲騎二千抵昇州城下克獲甚多太祖親  
討河東紹斌從何繼筠扼契丹兵于北百井獲勝而還



太平興國初擢龍衛軍指揮使領江州刺史二年梅山洞蠻叛與翟守素分擊之至邵州聞蠻酋符漢陽死去其居十里大破其衆擒蠻二萬令軍中去利劍二百斬之餘五十遣歸諭諸洞自是蠻黨帖服曹彬之攻幽州也命為先鋒指揮使遇契丹兵間奪牛羊器甲師還召見便殿加領溪州團練使復遣屯北面端拱元年拜冀州防禦使尋改解州淳化中為河中同丹坊鄜延橫嶺蕃界都巡檢使會鄭文寶議城席雞城砦為清遠軍紹

斌與文寶同領其役城畢以文寶之請命為知軍事至  
道元年拜會州觀察使仍判解州俄充靈州馬步軍部  
署領兵入蕃討賊斬首二千級護羊馬橐駝二萬計馬  
以給諸軍之闕者提聞手詔嘉諭之數部金粟帛詣靈  
武清遠遠人讐服不擾未幾皇甫繼明白守榮等督轉餉  
於靈州紹斌率兵援接抵賊并賊衆來薄陣紹斌且  
行且鬪至耀德凡殺千人寇復尾後紹斌為方陣使被  
傷者居中自將騎三百步弩三百大敗之于蒲洛河初

守榮與紹斌為期會繼明病卒故後一日未發為賊所  
圍守榮等欲擊之紹斌曰蕃戎輕佻勿棄輜重與戰當  
按轡結陣徐行守榮等不從紹斌因率所部去輜重四  
五里繼遷初見紹斌旌旗不敢擊守榮等自與邀功與  
戰賊先設伏以羸騎挑戰已而伏發守榮等戰敗紹斌  
率所部徐還一無遺矢至清遠

按隆平集載曰守榮等棄輜重與賊戰敗紹斌

為擊走賊獲糧以行  
與宋史本傳互異

與張延州會食見濠中人裸而呼

曰我白守榮也繩引而上遣內侍馬從順驛問太宗益

嘉之優詔褒美時命李繼隆范廷召討繼遷就命紹斌  
為本州都部署兼內外都巡檢使繼隆以浦洛之敗上  
聞言紹斌握兵不顧自以靈武非我不能守欲圖方面  
有異志太宗怒曰紹斌昔嘗背太原來投今又鼠首兩  
端真賊臣也即遣使補繫詔獄鞠問貶右監門衛率府  
副率虢州安置真宗即位召還授右監門衛大將軍領  
叙州刺史尋改萊州防禦使詔還其所籍帝居賜良馬  
十匹為環慶靈州清遠軍部署慶州伊濟族數為寇掠

道路患之嘗有驍捷卒二十餘往汾州為其掠奪即馳告紹斌紹斌召其酋帥三人斷臂馘劓於還寇逆帖服遷邢州觀察使傅潛屯中山紹斌三馳書于潛且言邊衆大至但列兵唐河南背城與戰慎無窮追潛性異懦聞之益不敢出敵衆益熾焚劫城砦車駕駐大名召潛屬吏詞逮紹斌免官黜為左衛率府副率送往上都禁其出入五年授右千牛衛將軍致仕景德初起為左龍武軍將軍永城兵馬都監三年遷左監門衛大將軍帝

以紹斌久失職不宜在衝要乃徙考城都監大中祥符  
初領長州刺史從東封朝覲壇就班軍士建充庭旗旗  
倒壓紹斌仆地遽起無傷時紹斌已老其壯健若此後  
遷左領軍衛大將軍領康州團練使鞏縣都監三年卒  
年七十七紹斌長兵間習戰法其後累以格鬪立功然  
性暴戾故屢被黜子守信為內殿崇班閤門祇候

按宋史此

下有王榮傳無事蹟足錄今從刪

楊瓊汾州西河人幼事馮繼業以材勇稱太原召置帳

帳下及即位隸御龍直三遷神勇指揮使從征太原以  
勞補御龍直指揮使淳化中李順亂蜀瓊往夔峽擒賊  
招安與尹元裴莊分路進討克資普州二雲安軍遣使  
即軍中真拜單州刺史至道初召還共職明年徙知霸  
州兼鈐轄未幾改防禦使靈慶路副都部署河外都巡  
檢使賊數寇邊瓊捍禦有功導黃河溉田民數千頃敗  
賊於合河鎮北賊騎五百掠城下擊破之追北三十里  
並賜詔嘉諭咸平四年以廊州觀察使充靈環十州軍

都部署蕙安撫副使遣使諭旨賊若寇清遠及青岡白馬砦即合兵與戰是秋果賊圍清遠頓積石河清遠屢走間使詣瓊請濟師瓊將悉出兵為援鈴轄內園使馮守規都監崇儀使張繼能曰敵近重兵在前繼無以進不可悉往乃止命副部署海州團練使藩璘都監西京左藏庫劉文質率兵六十赴之且曰伺我之繼至瓊逗遛不進頓慶州遣鈴轄李讓率兵往援至則城已陷賊泊青岡城下瓊與守規繼能方緩行出師及聞清遠之



敗盜恇怯不前順州刺史王瓊普謂瓊曰青岡地遠水  
泉非屯師計願棄之瓊合謀焚芻糧兵仗驅老幼以出  
瓊却師退保洪德砦賊侵未嘗交一鋒事聞召瓊輩悉  
擊御史獄治罪當死兵部尚書張齊賢等議請如律詔  
特貸命削官長流崖州繼能守規輩同坐藉其家業明  
年移道州景德初起為右領軍衛將軍分司西京累遷  
左領軍衛大將軍領賀州團練使知兗州有州卒自言  
得神術能飛行空中州人頗惑瓊捕至折其足奏戮之

五年卒年六十七錄其子舜臣為奉職長子舜賓內殿  
崇班閣門祇候

錢守俊濮州雷澤人少勇鷙嘗為盜陂澤中稱轉陂鷁  
周顯德中應募為鐵騎卒從征淮南戰紫金山下壽春  
獲戰艦十餘艘繼從克闕南太祖即位補禁衛隸散員  
直乾德中轉殿前班都知尋征太原方戰矢中左足拔  
而復進格鬪不已還改東西班指揮使遷馬步軍副都  
軍頭太平興國四年命與張紹勅李神祐劉承珪率師

屯定州以備北邊移屯趙州又從征范陽師還道遇敵戰于徐河斬奪頗衆雍熙三年命將北征田重進出飛狐道守俊以偏師為援邊騎雲集守俊按甲從容進戰大敗之連護屯兵于趙定代還掌軍頭引見司淳化三年出為覃州團練使又明年改遷齊州時河西蕃部內擾命以副都部署鎮其地徙屯石州有言守俊病且老握重兵不堪其職召為左領軍衛大將軍領潘州防禦使大中祥符三年卒年八十一守俊累從軍征討前後

中三十六創景德初錄其子允慶為奉職弟守信官崇儀副使守榮內園使

徐興青州人以拳勇得隸兵籍周顯德中從征淮右太祖即位隸御龍直會平澤潞上其功補控鶴軍使征晉陽部卒壅汾水灌并州城益多其勞遷本軍副指揮使太平興國初從潘美趣團栢谷奮與賊鬪生擒偽兵馬都監李美身被重創無所回撓加指揮使從征太原討幽薊屢中流矢以著績聞累遷秩出為洺州部署端拱

中修鎮定城逾月訖工改莫州防禦使知靜戎軍歷祁  
博二州咸平中為涇原環慶十州部署詔督轉靈武芻  
糧道積石遇寇與戰時涇原儀衛駐泊部署王榮援兵  
不應遂敗走坐削籍流郢州會赦入為右衛將軍遷左  
監門衛大將軍景德二年卒年六十八

王杲齊州人周顯德中應募為卒從世宗收三關隸先  
鋒太祖即位從征澤潞平揚州皆有戰功乃拔遷散指  
揮使累轉馬軍副都軍頭屯并州雍熙中為龍衛右第

二軍都虞候會遣趙寶忠還夏州命杲引兵護送及還保忠以方物贐杲拒不納太宗知之詔賜白金百兩遷右第一軍屯鎮州契丹入侵隸大將郭守文扞城杲守北關契丹兵退命督餉藁趣威虜軍還抵徐河時尹繼倫與契丹戰兵小衄杲遇于河上即按兵拒之獲勝守文上聞得召見問狀補部軍頭領勤州刺史命監河北有能聲尋命開教定州諸軍騎射入掌軍頭目引見司李順亂蜀與尹元並為西川招安使大敗賊衆以功真拜

唐州刺史時賊雖平道路尚梗餘黨或保山林以肆姦  
杲復與石普等追捕於彭州於是始平至道初乃還復  
遷靈州副部署累徙石隰副部署以轉餉河西失期降  
右千牛衛大將軍咸平五年出為亳州永城縣都監被  
召將入見以疾亟弗果卒年六十四

按宋史此下有李  
重誨傳無事蹟足

錄今  
從刪

白守素開封人父廷訓太祖即位為龍捷都指揮使守  
素以蔭補東班承旨太平興國五年遷補右班殿直以

善射授供奉官帶御器械三遷至供備庫使咸平中歷  
鎮州行營鈐轄改定州復徙鎮州王繼忠陷沒師還渡  
河契丹兵乘之守素據橋有矢數百每發必中敵不敢  
近遂引去真宗與輔臣議三路禦敵命魏能為威虜軍  
部署帝曰能頗強愎尤難其事聞守素久練邊計張銳  
性頗和善參知戎務庶克相濟乃命守素與銳並為鈐  
轄成順安以貳之景德元年契丹侵長城口守素與能  
大破之加領康州刺史又提騎卒戍靜戎軍兼沿營田



之役俄為鎮定鈴轄是冬契丹復內侵守素敗其前鋒  
獲車重又入敵境俘擒甚衆及請和省邊戎之職與曹  
瑑留任鎮定追叙前勞加合州團練使大中祥符三年  
命副李迪使契丹守素久居邊名聞北庭頗畏伏之帝  
慮其不欲行密遣內侍詢於守素守素頓首感咽即以  
崔可道代焉再遷南作坊使五年卒帝甚惜之錄其一  
子官

張思均邢州沙河人善擊劍挽強應募為卒晉開運間

遷廣銳軍使仕周為南北兩關巡檢太祖即位補龍衛

指揮使李繼勲下遼州戰帶甲祠追奔至長城擒其將

穆克善鮑淑俄屯潞州合戰三十餘以勞遷都虞候開

寶二年從郭進田欽祚戌三交戰石嶺關

按宋祖親征晉陽何繼筠

拒契丹於石嶺關考宋史太祖本紀及繼筠傳並作開寶二年本傳作三年誤今據改 閤門祇候

齊延琛苗杲陷敵中思鈞鼓勁騎突入奪還何繼筠入

晉境思鈞隸麾下拔南橋徑度大將出必辟為先鋒太

平興國初屯定州領兵援磁寇戰敗其衆身中五十創

奮不顧逐賊薄軍城奪馬及鎧甲而還敵復來攻又大敗之命賜服帶領河州刺史雍熙三年契丹入侵劉廷讓戰於君子館命思鈞翼從敗績陷敵中端拱初自契丹逃歸授澄州刺史知齊州思鈞以武進素不知民政僅踰月即徙濮鄆濱棣州巡檢至道中改鄆巡檢使會葺右堡砦擊寇走之未幾寇逼保安軍與曹瑋往援進躡五十餘里至木場寇乃遁去真宗即位徙益州鈐轄兼綿漢九州都巡檢使王鈞陷漢州思鈞攻克之斬

偽刺史苗進又與石普敗賊于彌牟砦巴西尉傅翱有  
善馬思鈞求之不與翱至責以轉後期斬之帝聞其  
事傳召付御史臺鞠治罪當斬特貸死削籍流封州復  
起為左司禦率府率考城監軍車駕幸澶淵翱詣行在  
命李繼隆石保吉同議兵事賜服御有嘉景德二年為  
西京水北都巡檢使俄分司西京翱對行在帝憫其老  
授唐州防禦副使徙鄭州大中祥符二年再遷左千牛  
衛將軍四年卒年八十九子承恩為三班奉職思鈞起

行伍征討稍有功質狀小而精捍太宗嘗稱其樓羅自  
是人目為小樓羅云

按宋史此下有李琪王延範二傳  
琪無顯著事蹟延範以左道謀為

不軌伏誅俱無  
足錄並從刪



欽定續通志卷三百十九